

## **Bae luna**

(Menzione al "Quartucciu 2009)

Muda-Muda e sentza pasu giras  
Mandas da situ in situ sa lùgura  
Ammiras tottu da-e-cuss'altura  
Apparis in su note e ti ritiras ;

Non pregas, non pianghes ne suspiras  
In allegresas e ne in tristura  
E su piantu de 'ogni criadura  
Paret chi tottu intendes e miras;

Ma bae luna! In s'immensu isteddadu,  
Giughe custu sorrisu in d'ogni logu  
Cun lughe giara, candida che nie;

Lu rifletas in cussu coru amadu,  
In cussos ojos chi lughen che fogu  
Chi curiosos sun mirende a tie.

## **Beranu**

(Sezione Poesia a tema libero 2012 - Premio Villanovatulo)

Torradu ses beranu lenu lenu  
a che ogare nues e titias  
chi s'ilgerru coladu fut pienu,

si benner innanti non podias  
ca da custu situ che fus lontanu  
ma fumis ispetende gia l'ischias.

Cantu ses bellu ti abreschind'a manzanu  
cun cussa frinichedda de ponente  
chi nos carignat pianti pianti,

cando ispuntat su sole a oriente  
apparidi cun totu s'isplendore  
imbiimbienenos su raju lughente

supra su padru ammantadu 'e lentore,  
in'ue s'ama ispetend'est bramosa  
chi benzat a las murgher su pastore.

Si biden lizeras sas mariposas  
chi bolende istan da lizu in lizu  
supra e violas, giraflos e rosas

A unu paradisu at assimizzu  
e totu su chi Deus at criadu  
como briosu nd'essidi a pizzu

in custu regnu amenu e incantadu  
intro de montes, addes e pianas  
su rusignolu cantat intonadu,

su crau-crau s'intende de ranas,  
suta salighes friscos, utiosos  
bundan de abba nos e funtanas

chi cun tintinnios armoniosos  
paret ch'intonen sos gosos de amores.  
Cando mai pintores virtuosos

apen leadu iscenas e colores  
e apen tentu simile talentu  
de pintare sas fozas e fiores

cun incantu ninnendelas su entu.

## **Est una 'oghe.....**

(Seconda classificata - Sonetto - Cuncursu 'e poesia Peppinu Mereu - Tonara 2014 )

Est una 'oghe pasida ch'intendo  
una campana 'etza e atonada,  
mi sonat druche druche in sa notada  
cando corcadu sa paghe pretendo.

Da ue arrivat subitu cumprendo  
pro chi non nd'ido pius sa pupada,  
ma s'anima non s'abarrat serrada  
issa est libera e deo non la prendo.

Una 'oghe ch'arrivat da lontanu  
da segus de sas nues, da cudd'ala,  
da cuss'illacanadu mundu arcanu,

finas chi mi serrat sas puppias  
delicada che movida de ala(s):  
est mama, chi mi cantat sas ninnias.